

黎城縣續志

目錄

卷一

序

纂修姓氏

圖

表

地理志

疆域

城池兵防附

山川村落附

古蹟墳墓園林附

政事志

戶口

田賦鹽法附

職官

公署

學校

祠祀

寺觀

紀事

卷二

人物志

選舉

進士
武科

舉人
仕宦

貢生
封贈

薦辟

名宦

名賢

孝義義行附

文苑

材能

流寓

方技

仙釋

列女

卷三

藝文志

詩

賦

傳

碑記

墓誌

卷四

補遺

沿革
寺觀

山川
紀事

古蹟
名賢

物產
流寓

鄉宦
列女

祠祀
藝文

糾誤

沿革
紀事

城池
名賢

山川
忠節

古蹟
流寓

附錄

書目
碑目

黎城縣續志卷之四

補遺

地理志

沿革

縣境在商周爲黎國

尙書西伯戡黎孔傳近王畿之諸侯在上黨東北
史記殷本紀西伯伐飢國滅之周本紀敗耆國正
義曰卽黎國也括地志云故黎城黎侯國也在潞
州黎城縣東北十八里尙書西伯戡黎是也

說文𪚩殷諸侯國在上黨東北

路史國名記昔文王伐飢本作𪚩音祈卽耆黎也
周書傳五年伐耆而大傳作戡耆故說以黎也
六韜決大疑武王封湯後於黎

呂氏春秋武王封堯後於黎

地理今釋黎國今山西潞安府黎城平順二縣地
案飢𪚩耆黎皆同聲字𪚩則其尊字古同聲字多
通假國都字多從邑非有數名也尙書戡黎宋儒
或以西伯爲武王周之始封呂覽與六韜各異皆

無可辨其故國據括地志在今縣而長治西南三十里有黎嶺所謂壺關黎亭者地理志郡國志元和志水經注書正義均以爲西伯所戡之黎左傳杜注詩式微釋文並謂周黎國亦在彼其地距今縣之黎侯城約一百六十里方乘無所適從遂創爲黎國最大上黨皆黎地之說以通之然兩地之間在殷末爲微子邑在周時爲潞子國謂黎有二都不可也古上黨兼今潞澤遼沁四府州地春秋晉未啟土之前皆狄所居如鐸辰甲氏留吁皋落

氏唐咎如皆赤狄之近潞者而謂上黨皆黎地尤不可也考地理者杜氏春秋釋例爲最精審酈氏水經注爲最博洽杜於左傳紂黎之蒐云或曰東夷國或曰魏郡黎陽是商時有二黎矣酈於河水所經之黎陽云黎侯國也詩式微黎侯寓於衛是直以周之黎爲在今濬縣矣地名偶同記載錯出抉擇爲難今人所見古書又不及其十一強相牽合愈形抵牾故嘗疑周初所封不必卽爲旣戡之國晉人所立不必卽爲始封之地元和郡縣志太

平寰字記並以壺關黎亭爲殷時國黎城故城爲
春秋國準其疆域揆以事義或有合也

春秋時國奪於赤狄潞氏晉滅潞復立之後卒爲晉
有

左宣十五年傳晉侯治兵於稷以略狄土立黎侯
而還哀四年傳齊國夏伐晉取壺口

元和郡縣志黎城古黎國春秋晉荀林父滅潞立
黎侯而還今縣東十八里黎侯城是也

地理今釋壺口在黎城縣東今名吾兒峪

案詩式微序黎侯爲狄逼逐在衛宣公時左傳鄧
舒奪黎氏地在衛穆公時蓋不百年而再失國矣
其初復歸其後地入於晉皆不詳爲何時然晉人
之立黎侯非真能興滅繼絕也特利狄土地藉爲
師端滅狄後畀以一邑俾奉宗祀與齊桓之復封
邢衛有別故春秋略而不書不然晉之君臣方侈
張其事未有不告諸列國者春秋方且嘉予之大
書特書之矣吾兒峪去黎故城約十里許爲晉東
出之通衢今猶名東陽關地旣爲晉有卧榻之下

豈容鼯睡黎之或削爲附庸或竟夷爲縣終春秋
世不能自存固可逆料而知也

戰國上黨地屬趙

戰國策蘇厲遺趙王書秦以三郡攻王之上黨羊
腸之西勾注之南非王有也樊餘謂楚王云韓兼
兩上黨以臨趙卽趙羊腸以上危

案羊腸坂在壺關縣南其西爲長治長子地其北
則黎潞諸縣也趙都邯鄲當坂左爲國門近險趙
上黨有今潞安遼沁地獨澤州屬韓爲韓之上黨

其後韓北擴地至屯留兼有趙地故云兩上黨然
羊腸之上諸縣仍始終屬趙也史記正義謂趙上
黨止有儀沁二州以國策證之其說未該

漢上黨郡潞縣地後漢因之

漢書地理志上黨郡縣十四潞故潞子國

續漢書郡國志上黨郡十三城潞本國注引上

記曰縣東北八十里有黎城臨壺口關

案今長治縣東亦有壺口關爲壺關名縣所自而
壺口之名遂移而南非復春秋之舊矣因疑黎亭

與關爲一時置當始於秦秦制縣十里有亭也潞
故縣明一統志在今潞城東北四十里卽潞子嬰
兒所都者

晉因之永興初并州刺史寄治縣東十五里之臺壁
旋罷

晉書地理志上黨郡統縣十潞第一左哀四年杜
注潞縣東有壺口關

魏書地形志并州漢晉治晉陽晉末治臺壁後治
晉陽又襄垣郡刈陵縣有臺壁

案并州治臺壁不見於晉書以事勢揆之當在惠
帝之末時爲并州刺史者司馬騰也劉元海載紀
永興元年元海僭號漢王騰使將軍聶元討之戰
於大陵敗績騰懼率并州二萬餘戶下山東其年
泚氏屯留長子皆爲劉曜所陷明年劉琨爲并州
刺史進據晉陽騰傳云騰在并州七年屢爲胡騎
圍城劉琨傳云并州刺史劉東瀛公騰以晉川荒
匱移鎮臨漳太原西河盡徙三魏琨受任并州屬
承其弊以諸文核之騰率并人下山東實取道上

黨時上黨郡治潞縣

於郡東僑立官府依壺口爲固及上

黨屬縣不守遂東奔於鄴志所云治臺壁當在此時其後劉琨代爲刺史由上黨轉戰而前并州復爲晉有志所云復治晉陽當在此時

後魏太武廢潞縣於今縣西北置刈陵縣初屬鄉郡後屬襄垣郡

魏書地形志襄垣郡建義元年置治襄垣城分鄉郡置

領縣四刈陵二漢晉曰潞真君十二年改後屬有

伏牛山黎城三壘山積布山潞城武軍城涉城涉

水臺壁

五朝志刈陵後魏以潞縣被誅遣人置

一統志刈陵故城在黎城縣西北

案此爲今縣境立縣之始據地形志所載疆域則合今潞城之北境河南涉縣之西境爲一縣地北齊因之後周置潞州於襄垣縣屬如故

元和郡縣志周顯德七年於襄垣置潞州

隋開皇中改刈陵縣爲黎城移潞州於上黨縣縣屬焉大業初改潞州爲上黨郡縣仍屬焉

元和郡縣志開皇十八年改刈陵爲黎城縣隋書
地理志上黨郡後周置潞州開皇初郡廢太業初
復置郡統縣十黎城有積布山松門山

案此爲黎城名縣之始自西漢迄後周皆與潞城
爲一縣地至是始各自爲縣由開皇十八年上溯
漢三年上黨置郡之始凡八百一年

唐武德初屬韓州貞觀之中復屬潞州天祐中改黎
亭五代之際復名黎城

元和郡縣志武德元年於襄垣置韓州縣屬貞觀